

皇帝中統元載擢用宿儒宣撫十道公首與其選公治河東有異政考爲天下最主上親召勞以卮酒至以字呼朝野榮之越四年上復命公爲東平宣慰使嘗曰曲阜實夫子之庭泰山爲中原神岳皆在境下所當親祀以至元重九前三日辦嚴以行由沂州門出時天宇晦冥翌日至林廟拜三聖墓雨氣猶未艾信宿抵岳祠明日登西華門雲則載陰載陽雨則間作間止咫尺三觀在水墨潑染間刹那千百其變公謂所親曰登頂之約蓋不敢定苟晴矣乃行否則恐勞而人旣而五鼓將作陰爲之解馭三唱未終星爲之芒錯於是州刺史張汝霖奉符令張佺司戶王天挺及從者三百指其肩輿輦公而上已而過黃峴飯於護駕泉次御帳少憩去天門不翅十五里路漸隘林樹四合就其罅望之大光凝碧如紺珠薄暮至絕頂由東以望見山影黝黑偃臥無際頃觀李斯碑僅得數字其餘漫不可識下自登封壇皆歷代磨崖亦復剝裂惟唐明皇御製紀泰山銘其字大如椀深幾寸泥金錯落獨有存者日沒少頃寒氣已逼人如仲冬時從者燎薪圍坐以待旦參甫中公起步自玉女池登日觀峰六合蹇開肅然無纖滓待蒸黍時東方朧朧乍離乍合移晷日露其半恍然如入無量金色界中凡在行者無不嘆詫及迴又得西影直抵昧谷若與崑崙爭雄